

水經第三十七

漢 桑 欽撰

後魏 酈道元注

明 吳 琯校

淹水 葉榆水 夷水 油水

澧水 沅水 浪水

淹水出越巂遂久縣徼外

呂忱曰淹水一曰復水也

東南至蜻蛉縣

縣有禺同山其山神有金馬碧雞光景儵忽民多

水經 卷之三十七

一

見之漢宣武遣諫大夫王褒祭之欲置其雞馬褒道病而卒是不果焉王褒碧雞訟曰敬移金精神馬縹碧之雞故左太冲蜀都賦曰金馬騁光而絕影碧雞儵忽而耀儀

又東過姑復縣南東入于若水

淹水逕縣之臨池澤而東北逕雲南縣西東北注若水也

益州葉榆河出其縣北界屈從縣東北流

縣故滇池葉榆之國也漢武帝元封二年使唐蒙開之以為益州郡郡有葉榆縣縣西北十里有吊



烏山衆鳥十百爲群其會嗚呼啁哳每歲七八月
至十六七日則止一歲六至雉雀來吊夜然火而
取之其無噉不食似特悲者以爲義則不取也俗
言鳳凰死於此山故衆鳥來吊因名曰吊鳥縣之
東有葉榆澤葉榆水所鍾而爲此川藪也

過不韋縣

縣故九隆哀牢之國也有牢山其先有婦人名沙
臺居于牢山捕魚水中觸沉木若有感因懷孕產
十子後沉木化爲龍出水九子驚走一子不能去
背龍而坐龍因挖之其母鳥語謂背爲九謂生爲

水經

卷之三十七

二

隆因名爲九隆及長諸兄遂相共推九隆爲王後
牢山下有一夫一婦生十女九隆皆以爲妻遂因
孳育皆畫身像龍文衣皆著尾九隆死世世不與
中國通漢建武二十三年王遣兵乘革船南下水
攻漢鹿崩民鹿崩民弱小將爲所擒於是天大震
雷疾雨南風漂起水爲逆流波湧二百餘里革船
沉沒溺死數千人後數年復遣六王將萬許人攻
鹿崩鹿崩王與戰殺六王哀牢耆老共埋之其夜
虎掘而食之明日但見骸骨驚怖引去乃懼謂其
耆老小王曰哀牢犯徼自古有之今此攻鹿崩輒

被天誅中國有受命之王乎何天祐之明也卽遣使道越巂奉獻求乞內附長保塞徼漢明帝永平十二年置爲永平郡郡治不韋縣蓋秦始皇徙呂不韋子孫於此故以不韋名縣北去葉榆六百餘里榆水不逕其縣自不韋北注者盧倉禁水耳榆水自縣南逕遂久縣東又逕姑復縣西與淹水合又東南逕永昌邪龍縣縣以建興三年劉禪公隸雲南於不韋縣爲東北

東南出益州界

葉榆水自邪龍縣東南逕秦藏縣也南與濮水同

水經

卷之三十七

三

注填澤於連然雙栢縣也榆水自澤又東北流滇池縣南又東逕同並縣南又東逕漏江縣伏流山下復出蝮口謂之漏江左思蜀都賦曰漏江湫流潰其阿泊若暘谷之揚濤沛若濛汜之湧波諸葛亮之平南中也戰於是水之南榆水又逕賁古縣北東與盤江合盤水出津高縣東南盤町山東逕梁水郡北賁古縣南水廣百餘步深處十丈甚有瘴氣朱哀之反李恢追至盤江者也建武十九年伏波將軍馬援上言從麋泠出賁古擊益州臣所將越駱萬餘人便習戰鬪者二千兵以上弦毒矢

利以數發矢往如雨所中輒死愚以行兵此道最便蓋承藉水利用爲神捷也盤水又東逕漢興縣山溪之中多生邛竹桄榔樹樹出綿而夷人資以自給故蜀都賦曰邛竹緣嶺又曰麩有桄榔盤水北入榆水諸葛亮入南中戰於盤中是也

入牂牁郡西隨縣北爲西隨水又東出進桑關

進桑縣牂牁之南部都尉治也水上有關故曰進桑關也故馬援言從麋泠水道出進桑王國至益州賁古縣轉輸通利益兵車資運所由矣自西隨至交阯崇山接險水路三千里榆水又東南絕温

水經

卷之三十七

四

水而東南注于交阯

過交阯麋泠縣北分爲五水絡交阯郡中至東界復合爲三水東入海

尚書大傳曰堯南撫交阯於禹貢荊州之南垂幽荒之外故越也周禮南八蠻雕題交阯有不粒食者焉春秋不見於傳不通於華夏在海島人民鳥語秦始皇開越嶺南立蒼梧南海交阯象郡漢武帝元鼎二年始并百越啓七郡於是乃置交阯刺史以督領之初治廣信所以獨不稱州時又建朔方郡已始開北至遂交阯於南爲子孫交阯也麋

泠縣漢武帝元鼎六年開都尉治交阯外域記曰
越王令二使者與主交阯九真二郡民後漢遣伏
波將軍路博德討越五路將軍到合浦令越王二
使者齎牛百頭酒千鍾及二郡民戶口簿詣路將
軍乃拜二使者爲交阯九真太守主諸雒將主民
如故交阯郡及州本治於此也州名爲交州後朱
戴雒將子名詩索麋泠雒將女名微側爲妻側爲
人有膽勇將詩起賊攻破州郡服諸雒將皆屬微
側爲王治麋泠縣得交阯九真二郡民二歲調賦
後漢遣伏波將軍馬援將兵討側詩走入金溪究

水經

卷之三十七

五

三歲乃得余時西蜀並遣兵共討側等悉定郡縣
爲令長也山多大蛇名曰髯蛇長十丈圍七八尺
常在樹上伺鹿獸鹿獸過便低頭繞之有頃鹿死
先濡令濕訖便吞頭角骨皆鑽皮出山夷始見蛇
不動時便以大竹籬籬蛇頭至尾殺而食之以爲
珍異故楊氏南裔異物志曰髯惟大蛇旣洪且長
采色駁犖其文錦章食灰吞鹿服成養創賓享嘉
宴是豆是觴言其養創之時肪腴甚肥搏之以婦
人衣投之則蟠而不起走便可得也此二水左水
東北逕望海縣南建武十九年馬援征微側置又

東逕龍淵縣北又東合南水自麋泠縣東逕封溪縣北交州外域記曰交阯昔未有郡縣之時土地有雒田其田從潮水上下民墾食其田因名爲雒民設雒王雒侯主諸郡縣縣多爲雒將雒將銅印青綬後蜀王子將兵三萬來討雒王雒侯服諸雒將蜀王子因稱爲安陽王後南越王尉他舉衆攻安陽王安陽王有神人名臯通下輔佐爲安陽王治神弩一張一發殺三百人南越王知不可戰却軍住武寧縣按晉太康記縣交阯越遣太子名始降服安陽王稱臣事之安陽王不知通神人遇之

水經

卷之三十七

六

無道通便去語王曰能持此弩王天下不能持此弩者亡天下通去安陽王有女名曰眉珠見始端正珠與始交通始問珠令取父弩視之始見弩便盜以鋸截弩訖便逃歸報越王越進兵攻之安陽王發弩折遂敗安陽王下船逕出於海今平道縣後王宮城見有故處晉太康地記縣屬交阯越遂服諸雒將馬援以西南治遠路逕千里分置斯縣治城郭穿渠通道溉灌以利其民縣有猩猩獸形若黃狗又狀貍貍人面頭顏端正善與人言音聲麗妙如婦人好女對語交言聞之無不酸楚其

肉甘美可以斷穀窮年不厭又東逕浪泊馬援以其地高自西里進屯此又東逕龍淵縣故城南又東左合此水建安二十三年立州之始蛟龍蟠編於水南北二津故改龍淵以龍編爲名也盧循之寇交州也交州刺史杜惠度率水步晨出南津以火箭攻之燒其船艦一時潰散循亦中矢赴火而死於是斬之傳首京師惠度以斬循勳封龍編侯劉欣期交州記曰龍編縣功曹左飛曾化爲虎數月還作吏旣言其化亦化無不在牛哀易虎不識厥兄當其革狀安知其譌變哉其水又東逕曲易

水經

卷之三十七

七

縣東流注于浪鬱經言於郡東界復合爲三水此其一也其次一水東逕封谿縣南又西南逕西子縣南又東逕羸陵縣北又東逕北帶縣南又東逕稽徐縣涇水注之水出龍編縣高山東南流入稽徐縣注于中水中水又東逕羸陵縣南交州外域記曰本縣交阯郡治也林邑記曰縣本自交阯南行都官塞浦出焉其水自縣東逕安定縣北帶長江江中有越王所鑄銅船潮水退時人有見之者其水又東流隔水有泥黎城言阿育王所築也又東南合南水南水又東北逕九德郡北交州外城

記曰交阯郡界有扶嚴究在郡之北隔渡一江卽是水也江北對交阯朱戴縣又東逕浦陽縣北又東逕無功縣北建武十九年九月馬援上言臣謹與交阯精兵萬二千人與大兵合二萬人船車大小二千艘自入交阯於今爲盛十月援南入九真至無功縣賊渠降進入餘發渠帥朱伯棄郡亡入深林巨藪犀象所聚羣牛數千頭時見象數十百爲群援又分兵入無編縣王之九真亭至居風縣帥不降並斬級數十百九真乃清其水又東逕句漏縣縣帶江水江水對安定縣林邑記所謂外越

水經

卷之三十七

八

安定縣紀粟者也縣江中有潛牛形似水牛上岸鬪角軟還入江水角堅復出又東與北水合又東注鬱亂流而逝矣此其三也平撮通稱同歸鬱海故經有入海之文矣

夷水出巴郡魚復縣江

夷水卽狼山清江也水色清照十丈分沙蜀人見其澄清因名清江也昔廩君浮土舟於夷水據捍關而王巴是以法孝直有言魚復捍關臨江據水實益州禍福之門夷水又東逕建平沙縣縣有巫城南岸水山道五百里其水歷縣東出焉

東南過狼山縣南

夷水自沙渠入縣水流淺狹裁得通船東逕難留
城南城卽山也獨立峻絕西面上里餘得石穴把
火行百許步得二大石磧並立穴中相去一丈俗
名陰陽石陰石常濕陽石常燥每水旱不調居民
作威儀服飾往入穴中旱則鞭陰石應時雨多雨
則鞭陽石俄而天晴相承所說往往有效但捉鞭
者不壽人頗惡之故不爲也東北面又有石室可
容數百人每亂民入室避賊無可攻理因名難留
城也昔巴蠻有五姓未有君長俱事鬼神乃共擲

水經

卷之三十七

九

劍於石穴約能中者舉以爲君巴氏子務相乃中
之人又今乘土舟約浮者當以爲君唯務相獨浮
因共立之是爲廩君乃乘土舟從夷水下至鹽陽
鹽水有神女謂廩君曰此地廣大魚鹽所出願留
共居廩君不許鹽神暮輒來宿旦化爲蟲群飛蔽
日天地晦暝積十餘日廩君因伺便射殺之天乃
開明廩君乘土舟下及夷城夷城石岸嶮曲其水
亦曲廩君望之而歎山崖爲崩廩君登之上有平
石方二丈五尺因立城其傍而居之四姓臣之死
精魂化而爲白虎故巴氏以虎飲人血遂以人祀

鹽水卽夷水也又有鹽石卽鹽陽石也盛弘之以是推之疑卽廩君所射鹽神處也將知是陰石是對陽石立名矣事既鴻古難爲明徵夷水又東逕石室在層巖之上石室南向水其下懸崖千仞自水上逕望見每見陟山嶺者扳木側足而行莫知其誰村人駱都小時到此室邊採蜜見一仙人坐石牀上見都疑矚不轉都還招村人重往則不復見鄉人今名爲仙人室袁崧云都孫昔尚孝夷水又東與溫泉三水合大溪南北夾岸有溫泉對注夏煖冬熱上常有霧氣瘍疾百病浴者多愈父老

水經

卷之三十七

十一

傳此泉先出鹽于今水有鹽氣夷水有鹽水之名此亦其一也夷水又東逕很縣故城南縣卽山名也孟康曰音怛出藥草怛山今世以銀爲音也舊武陵之屬縣南一里卽清江東注矣南對長楊溪溪水西南潛穴穴在射堂射東六七里谷中有石穴清泉潰流三十許步復入穴卽長楊之源也水中有神魚大者二尺小者一尺居民釣魚先陳所須多少拜而請之拜訖投釣餌得魚過數者水輒波湧暴風卒起樹木摧折水側生異花路人欲摘者皆當先請不得扳取水源東北之風井山廻曲

有異勢穴口大如盆袁山崧云夏則風出冬則風入春秋分則靜余往觀之其時四月中去穴數丈須臾寒慄卒至六月中尤不可當往人有冬過者置笠穴中風吸之經月還步楊溪得其笠則知潛通矣其水重源顯發北流注于夷水此水清冷甚於大溪縱暑伏之辰尚無能燥其津流也縣北十餘里有神穴平居無水時有渴者誠啓請乞輒得水或戲求者水終不出縣東十許里至平樂村又有石穴出清泉中有潛龍每至大旱平樂村左近村居輦草穢著穴中龍怒須臾水出蕩其草穢傍

水經

卷之三十七

十一

側之田皆得澆灌從平樂順流五六里東亭村北山甚高峻上合下空空徼東西廣二丈許高起如屋中有石林甚整頓傍生野韭人往乞者神許則風吹別分隨偃而輸不得過越不偃而輸輒凶往觀者去時特平暨處自然恭肅矣

又東過夷道縣北

夷水又東逕虎灘岸石有虎像故因以名灘也夷水又東逕釜瀨其石大者如釜小者如刀斗形色亂真雜石中耳夷水又東北有水注之其源百里與丹水出西南望州山山形竦峻峯秀甚高東北

白巖壁立西南小演通行登其頂平可有三畝許
上有故城城中有水登城望見一州之境故名望
州山俗語訛今名武鍾山山根東有湧泉成溪卽
丹水所發也下注丹水天陰欲雨輒有赤氣故名
曰丹水矣丹水又逕亭下有石穴甚深未嘗測其
遠近穴中蝙蝠大者悉多倒懸玄中記曰蝙蝠百
歲者倒懸得而服之使人神仙穴口有泉冬溫夏
冷秋則入藏春則出遊民至秋闌斷水口得魚大
者長四五尺骨軟肉美異於餘魚丹水又逕下積
而爲淵淵有神龍每旱村人以芮草淵上流魚則
多死龍怒當時大雨丹水又東北流兩岸石上有
虎跡甚多或深或淺皆悉成就自然成非人工丹
水又北注于夷水水色清澈與大溪同夷水又東
北逕夷道縣北而東注

東入于江

又夷水逕宜都北東入大江有涇渭之北亦謂之
浪山北溪水所經皆石山略無土岸其水虛映俯
視遊魚如乘空也淺處多五色石冬夏激素飛清
傍多茂木空岫靜夜聽之恒有清響百鳥翔禽哀
鳴相和巡頽浪者不覺疲而忘歸矣

油水出武陵孱陵縣西界

縣有白石山油水所出東逕其縣西與滄水合水出高城縣滄山東逕其縣下東至孱陵縣入油水也縣治故城王莽更名孱陵也劉備孫夫人權妹也又更修之其城背油向澤

又東北入于江

油水自孱陵縣之東北逕公安縣西又北流注于大江

澧水出武陵充縣西歷山東過其縣南

澧水自縣東逕臨澧零陽二縣故界水之南岸白

水經

卷之三十七

十三

石雙立厥狀類人高各三十丈周四丈古老傳言昔充縣尉與零陽尉共論封境因相傷害化而爲石東慄零陽西碣充縣廢省臨澧卽其地縣臨封縣之故治臨側澧水卽爲縣名晉太康四年置澧水又東茹水注之水出龍茹山水色清澈漏石分沙莊辛說楚襄王所謂飲茹溪之流者也茹水東流澧水

又東過零陽縣之北

澧水東與溫泉水會水發北山石穴中長三十丈冬夏沸湧常若湯焉溫水南流注于澧水澧水又

東合零溪水源南出陵陽之山歷溪北注澧水澧水又東九渡水注之水南出九渡山山下有溪又以九渡爲名山獸咸飲此水而逕越他津皆不飲之九渡水北逕仙人樓下傍有石形極方峭世名之爲仙樓水自下瀝溪曲折逶迤傾注行者間關每所褰泝山水之號蓋亦因事生焉九渡水又北流注于澧水澧水又東婁水入焉水源出巴東界東逕天門郡婁中縣北又東逕零陽縣注于澧水澧水又東逕零陽縣南蘊郡零溪以著稱矣澧水又逕澧縣右會漑漑水出建平郡東逕漑陽縣南

水經

卷之三十七

古

晉太康中置漑水又左合黃水黃水出零陽縣西北連巫山溪出雄黃頗有神異採常以冬月祭祀鑿石深數丈方得佳黃故溪水取名焉黃水北流注于漑水漑水又東注澧水謂之漑口澧水又東逕澧陽縣南南臨澧水晉太康四年立天門郡治也吳永安六年武陵郡高梁山高峰孤竦素壁千尋望之茗亭有似香爐其山洞開玄朗如門高三百丈廣二百丈孫休以爲嘉祥分武陵置天門郡澧水又東歷層步出高秀特山下有峭澗泉流所發南流注于澧水

又東過作唐縣北

作唐縣後漢分孱陵置澧水入縣左合泝水水出西北天門郡界南流逕泝評屯屯塌泝水溉田數千頃又東南流注于澧水澧水又東澹水出焉澧水又南逕故郡城東東轉逕作唐縣南澧水又東逕安南縣南晉太康元年分孱陵立澹水注之水上承澧水於作塘縣東逕其縣北又東注于澧謂之澹口王仲宣贈孫文始詩曰悠悠澹澧者也澧水又東與赤沙湖水會湖水北通江而南注澧謂之決口澧水又東南注于流水曰澧口蓋其枝瀆

水經

卷之三十七

五

耳離騷曰沅有芷兮澧有蘭

又東至長沙下嶠縣西北東入于江

澧水流注于洞庭湖俗謂之曰澧江口也

沅水出牂牁且蘭縣爲旁溝水又東至鐔城縣爲沅水東逕無陽縣無水出故且蘭南流至無陽故縣對無水因以氏縣無水又東南入沅謂之無口沅水東逕無陽縣南臨運水水源出東南岸許山西北逕其縣南注于熊溪熊南帶移山山本在水北夕中風雨旦而山移水南故山以移爲名蓋以蒼梧郁州佐山之類也能溪下注沅水沅水又東逕

辰陽縣縣有龍溪水南出于龍橋之山北流入于沅水又一沅水注之南出扶陽之山北流會于沅沅水又東與序溪合水出義陵郡義陵縣酈梁山西北流逕義陵縣王莽之建平縣也治序溪其城劉備之秭歸焉出五溪綏撫蠻夷亮率諸蠻所築也所治序溪最爲沃壤良田數百頃特宜稻修作無廢又西北入于沅沅水又東合柱水水導源柱溪北流注沅沅水又東逕辰陽縣南東合辰水水出縣三山谷東南流獨毋水注之水源南出龍門山歷獨毋溪北入辰水辰水又逕其縣北舊治在

水經

卷之三十七

六

也酉水導源益州巴郡臨江縣故武陵之充縣酉源山東南流逕陽故縣南又東逕遷陵故縣界與西鄉溪合卽延江之枝津更始之下流謂之西鄉溪口酉水又東逕遷陵縣故城北王莽更名曰遷陸也酉水東逕酉陽故縣南縣故酉陵也酉水又東逕沅陵縣北又東南逕潘承明壘西承明討五溪蠻營軍所築其城跨山枕谷酉水又南注沅水闕駟謂之受水其水所決入名曰酉口沅水又逕竇應明城側應明以元嘉初伐蠻所築也沅水又東溪水南出茗山山深迴嶮人獸咀絕溪水北瀉

沅川水沅水又東與諸魚溪水合水北出諸魚山
山與天門郡之澧陽縣分嶺溪水合南流會于沅
沅水又東夷水入焉水南出夷山北流注沅夷山
東接胡頭山山高一百里廣圓三百里山下水際
有新息侯馬援征武溪蠻停軍處胡頭徑曲多險
其中紆折千灘援就胡頭希效早成道遇瘴毒終
沒於此忠以獲謗信可悲矣劉澄之曰沅水自胡
頭枝分跨三十三渡逕交阯龍編縣東北入于海
脉水尋梁乃非關究但古人許以傳疑聊書所聞
耳

水經

卷之三十七

十七

又東北過臨沅縣南

臨沅縣與沅南縣分水沅南縣西有夷望山孤竦
中流浮嶮四絕昔有蠻民避寇居之故謂夷望也
南有夷望溪水南出重山遠注沅沅水又東得關
下山東帶關溪瀉注沅瀆沅水又東歷臨沅縣西
爲明月池白壁灣灣狀半月清潭鏡澈上則風籟
空傳下則泉響不斷行者莫不擁蹙嬉游徘徊愛
玩沅水又東歷三石澗鼎足均峙秀若削成其側
茂竹便娟致可玩也又東帶綠蘿山頽巖臨水懸
蘿鈎渚漁詠幽谷浮響若鍾沅水又東逕平山西

南臨沅水寒松上蔭清泉下注栖託者不能自絕於其側沅水又東逕臨沅縣南縣沅水因以爲名王莽更之監沅縣也縣南有晉徵士漢壽詩龔玄之墓銘太元中車武子立縣治武陵郡下本楚之黔中郡矣秦昭襄王二十七年使司馬錯以隴蜀軍攻楚割漢北與秦至三十年又取楚巫黔及江南地以爲黔中郡漢高祖二年割黔中故治爲武陵郡王莽更之達平都也南對沅南縣後漢建武中所置也縣在沅水之陰因以沅南爲名縣治故城昔馬援討臨鄉所築也沅水又東歷小灣謂之

水經

卷之三十七

六

枉渚渚東里許便得枉人山山西帶循溪一百餘里茂竹便娟披溪蔭渚長川逕引遠注於沅沅水又東入龍陽縣有澹水出漢壽縣西楊山南流東折逕其縣南縣治索城卽索縣之故城也漢順帝陽嘉中改從今名鬪駟以爲興水所出東入沅而是水又東歷諸湖方南注沅亦曰漸水也水所入之處謂之鼎口沅水又東歷龍陽縣之汜洲洲長二十里吳丹陽太守李衡植柑于其上臨死勅其子曰吾洲里有木奴千頭不責衣食歲絹千疋太史公曰江陵千樹橘可當封君此之謂矣吳末衡

甘成歲絹千疋今洲上猶有陳根餘枿蓋其遺也
沅水又東逕龍陽縣北域側沅水沅水又東合壽
溪內通大溪口有木連理根各一岸而凌空交合
其上承諸湖下注沅水

又東至長沙下雋縣西北入于江

沅水下注洞庭湖方會於江

浪水出武陵鍾城縣北界沅水谷

山海經禱過之山浪水出焉而南流注于海是也
南至鬱林潭中縣與鄰水合

水出無陽縣故鍾城也晉義熙中改從今名俗

水經

卷之三十七

九

謂之移溪溪水南歷鍾中注于浪水

又東至蒼梧陵縣爲鬱溪又東至高要縣爲大水

鬱水鬱林之阿林縣東逕猛陵縣猛陵縣在廣信
之西南王莽之猛陸也浪水於縣左合鬱溪亂流
逕廣信縣地理志曰蒼梧郡治武帝元鼎六年開
王莽之新廣郡縣曰廣信亭王氏交廣春秋曰元
封五年交州自羸樓縣移治於此建安十六年吳
遣臨淮步騭爲交州刺史將武吏四百人之交州
道路不通蒼梧太守長沙吳臣擁衆五千騭有疑
於臣先使諭臣臣迎之於零陵遂得進州臣旣納

隲而後有悔隲以兵少恐不存立臣有都督區景
勇略與臣同士爲用隲惡之陰使人請臣臣往告
景勿詣隲隲請不已景又往乃於廳事前中庭俱
斬以首徇衆卽此也鬱水又逕高要縣晉書地理
志曰縣東去郡五百里刺史夏避毒徙縣水居也
縣有鵠奔亭廣信蘇施妻始珠鬼訟於交州刺史
何敞處事與釐亭女鬼同王氏交廣春秋曰步隲
殺吳臣區景使嚴舟船合兵二萬下取南海蒼梧
人衡毅錢博宿臣部伍興軍逆隲於蒼梧高要峽
口兩軍相逢於是遂交戰毅與衆投水死者千有

水經

卷之三十七

三

餘人

又東至南海番禺縣西分爲二其一南入于海

鬱水分浪南注

其一又東過縣東南入于海

浪水東別逕番禺山海經謂之賁禺者也交州治
中合浦姚文式問云何以名爲番禺答曰南海郡
昔治在今州城中與番禺縣連接今入城東南偏
有水圻陵城倚其上聞此縣人名之爲番山縣名
番禺儻謂番山之禺也漢書所謂浮牂牁下離津
同會番禺蓋乘斯水西入越也秦并天下略定楊

越置東南一尉西北一侯開南海以謫徙民至二世時南海尉任囂召龍川令趙他曰聞陳勝作亂豪桀叛秦吾欲起兵阻絕新道番禺負嶮可以爲國會病綿篤無人與言故召公來告以大謀囂卒他行南海尉事則拒關門設守以法誅秦所置吏以其黨爲守自立爲王高帝定天下使陸賈就立他爲越王剖符通使至武帝元鼎五年遣伏波將軍路博德等攻南越王五世九十二歲而亡以其地爲南海蒼梧鬱林合浦交阯九真日南也建安中吳遣步騭爲交州騭到南海見土地形勢觀尉

水經

卷之三十七

三

他舊治處負山帶海博敞渺目高則乘土下則沃衍林麓鳥獸于何不有海怪魚鼈鼉鱉鮮鱓珍怪異物千種萬類不可勝記他因岡作臺北面朝漢圓基千步直峭百丈頂上三畝復道廻環逶迤曲折朔望升拜名曰朝臺前後刺史郡守遷除新至未嘗不乘車升履於焉逍遙騭登高遠望覩巨海之浩茫觀原藪之殷阜乃曰斯誠海島膏腴之地宜爲都也建安二十二年遷州番禺桀立城郭綏和百越遂用寧集交州治中文武問答云朝臺在州城東北三十里裴淵廣州記曰城北有尉他墓

墓後有大岡謂之馬鞍岡秦時占氣者言南方有天子氣始皇發民鑿破此岡地中出血今鑿處猶存以狀取目故岡受厥稱焉王氏交廣春秋曰越王趙他生有奉制稱藩之節死有秘異神密之墓他之葬也因山爲墳其壟塋可謂奢大葬積珍玩吳時遣使發掘其墓求索棺柩鑿山破石費日損力卒無所獲他雖奢僭慎厥其身乃令後人不知其處有似松喬遷景牧豎固無所殘矣鄧德明南康記曰昔有盧耽仕州爲治中少棲仙術善解雲飛每夕輒凌虛歸家曉則還州嘗於元會至朝不

水經

卷之三十七

三

及朝列化爲白鵠至閣前迴翔欲下威儀以石擲之得一隻履耽驚還就列內外左右莫不駭異時步騭爲廣州意甚惡之便以狀列聞遂在誅滅廣州記稱吳平晉盧循爲刺史循鄉人語循鰕鬚長一赤循以爲虛責其人乃至東海取蝦鬚長四赤速送示循循始復謝厚爲遣其一水南入者鬱川分派逕四會入海也其一卽川東別逕番禺城下漢書所謂浮牂牁下離津同會番禺蓋乘斯水而入于越也浪水又東逕懷化縣入于海水有鰕魚裴淵廣州記曰鰕魚長二丈大數圍皮皆鱗物生

子子小隨母覓食驚則還入母腹吳錄地理志曰
鰾魚子朝索食暮入母腹南越志曰暮從臍入旦
由口出腹裏兩洞腸貯水以養子腸容二子兩則
四焉其餘又東至龍川縣爲涅水屈北入員水浪
水枝津衍注自番禺東歷增城縣南越志曰縣多
鷓鷃鷓鷃山鷄也光色鮮明五色眩耀利距善鬪
世以家鷄鬪之則可擒也又逕博羅縣西界龍川
左思所謂日龍川而帶坳者也趙他乘此縣而跨
據南越矣

員水又東南一千五百里入南海

水經

卷之三十七

三

東歷揭陽縣王莽之南海亭而注于海也

水經第三十七